

Uunga siunnersuut: Soraarnerussutisiaqalernissamut aaqqissuussinermut peqataasussaatitaaneq pillugu Inatsisartut inatsisaata allanngortinneqarnera pillugu Inatsisartut inatsisaat

(Aningaasaqarnermut Naligiissitaanermullu Naalackersuisoq)

Akissuteqaat

(Aningaasaqarnermut Naligiissitaanermullu Naalackersuisoq)

Aappassaaneerpeqarnera

Naalackersuisut sinnerlugit ataatsimiititaliap isumaliutissiissutaanut qujarusuppunga.

Naalackersuisut ilaatigut annertunerusumik ilisimatitsinissamut kaammattuinerit tusaatissatut tiguai Inatsisartullu inatsisaanik suliamut ilanngutissallugit.

Ataatsimiititaliami amerlanerussuteqartut inatsisip atuutilernerata kingorna soraarnerussutisiaqalernissamut peqataasussaatitaanermut pisut ilaanni marloqiusamik ileqqaartitsisoqarsimanersoq isumaliutigaat. Amerlanerussuteqartut Naalackersuisut tassannga sianiginninnissaat kaammattuutigaat, taamaattoqarpallu pissutsit aaqqiviginiarlugit siunnersuummik saqqummiussinissaat kaammattuutigalugu. Kaammattuut Naalackersuisut malissavaat, Akileraartanermullu Aqutsisoqarfiup tassannga sianiginninnissaanik qinnuigissallugu.

Demokraatit partiitut ikinnerussuteqarluni oqaaseqaataani ajornartorsiut assingusoq qaqippaa. Partiip soraarnerussutisiaqalernissamut peqataasussaatitaanermut inatsit malillugu inuit ilaat naak allamik soraarnerussutisiaqalernissamut aaqqissuussamut ilaareeraluarlutik, soraarnerussutisiaqalernissaminnut ileqqaarnissamik pisussaaffilerneqartarnerat paasisimallugu, oqaatigaa. Naalackersuisut ilisimatitsissutigissavaat, inatsit ukiut tamaasa innuttaasut soraarnerussutisiassaminnik katersivimminnut akiligassaannik, innuttaasoq ataatsimut A-nik B-nillu isertitaannit minnerpaamik procentiliisartoq. Tassunga atatillugu innuttaasoq ataatsimut katersisussaaffimminik malinninnermini soraarnerussutisiassaminut katersisussaaffini soraarnerussutisiaqalernissamut aaqqissuussamut ataatsimut arlalinnulluunniit akiliinermigut malinnera soqutaanngilaq. Inatsisip aallaavittut soraarnerussutisiassanik katersiviit, inuunermut soraarnerussutisiaqalernissamulluunniit sillimmasiisarfiit nunatsinniittut Danmarkimiuttulluunniit, imaluunniit aningaaseriviit nunatsinniittut atuuffeqartulluunniit kisiisa akuerisarimmagit eqqumaffigineqassaaq.

Inatsisissatut siunnersuutikkut soraarnerussutisiaqalernissamut ileqqaaruteqarnissap atuutilernissaanut killigitaq annertuumik qaffanneqarpoq. Innuttaasut ilaat amerlaneranit isertitakitsut ileqqaaruteqarnissamut ilaatinneqannginnerat tamatuma kinguneraa. Demokraatit partiitut ikinnerussuteqarluni oqaaseqaataani tamanna isornartorsiorpaat, partiimmi soraarnerussutisiaqalernissamut peqataasussaatitaanermut inatsisip taamaalilluni aningaasaatikinnerit soraarnerussutisiaanik qulakkiinngikkai tunngavissaatimmagu. Ajorluartumik partiip tamanna

paasinerlussimavaa. Nunatta aningaasaqarnerata patajaassusaa ukiuni aggersuni innuttaasut ilaasa soraarninngortut amerliartupiloornerisigut nanerneqassaaq. Taamaammat soraarnerussutisiaqalernissamut peqataasussaaitaanermut inatsit amerlanerit utoqqalinerminni imminnut pilersorsinnaanerannik qularnaarinissamik siunertaqarpoq, taamaaliornikkut ukiuni aggersuni inuiaqatigiit aningaasaqarnermikkut pissakinnerusut isumagineqarnissaannut akissaqartoqassammat. Taamaalilluni innuttaasut aningaasaqarnikkut isumalluuteqarnerusut annertunerusumik utoqqalinerminni imminnut pilersorsinnaanerannik periarfissamik inatsit annertusaavoq, taamaalilluni nunatta karsiata aningaasaatai killeqartut eqimattanik aningaasaqarnikkut pissakinnerusunik ikiuinissamut annertunerusumik atorneqarsinnaaqqullugit.

Naleraq naatsumik ikinnerussuteqartutut oqaaseqaateqarnermini, inatsit innuttaasut kaasarfiinit aallersoq oqaatigaa. Soraarnerussutisiap akileraarutaannginnera, innuttaasulli ataasiakkaat soraarninngornerminni tigusinnaasaatut ileqqaarutigigaat partiip arajutsisimagaa isumaqarnarpoq.

Taamatut oqaaseqarlunga Naalackersuisut sinnerlugit siunnersuut saqqummiunneqartoq allannguuteqarani pingajussaaneerneqassasoq inassutigaa.